

Xajon ra tsikínda jè Pablo ra isìkasén-la xità naxindá-la Cristo ra títsajna ya Filipos

Kó'sín síhixo'ta Pablo xità Filipos

1 ¹Nga'tsi-najìon ra xità-la Nainá ma jìon ra a'ta 'tse Cristo Jesús, ra ya titsajna ya naxindá Filipos, kò jìon ra nìkindaa naxindá-la Nainá, kò jìon ra ya bisìko'ta-te, 'koaá 'sín nìhixo'ta-lajìn 'an Pablo kò Timoteo ra chí'nda'nño-la Jesucristo ma-jìn. ²Nainá ra Na'ín-ná ma kò jè Jesucristo ra tíjna ítjòn-ná katatsjá-no kjonnda kò kjo'nchán ya ajin inìma-no.

Kó'sín nga tsjá-la kjonnda Nainá jè Pablo ra a'ta 'tse xità Filipos

³'Kiá nga india india bítsjen-na ra a'ta tsajìon-jìon, 'koaá 'sín xin-la 'an jè Nainá ra 'an bexkon nga tse kjonnda kata'se-la ra jè. ⁴'Kiá nga ta mé hora-ni nga chjà'tà-la Nainá ngi kòó kjotsja ra tíjìn inìma-na nga bitsá'ba-la ra a'ta tsajìon-jìon. ⁵Nga ndaá inçhibisìko'tá-nájìon nga inchi'bènajmíya 'én xitse ra nda tsò a'ta 'tse Cristo skanda 'kiá nga tí'sa kjokjiín-nájìon kò skanda 'ndi-ni. ⁶Ijyeé kò'sín kixi tíjn takoàan nga jè Nainá ra kò'sín ya a'ta tsajìon tsikí'tsiako kjonnda-la, 'koaá 'sín nda sìjngo xá-la skanda 'kiá nga jè nìchjìn 'kiá nga kj'íí india-ni jè Jesucristo. ⁷Tjín-na kjohixi nga kò'sín síkítsjeen ra a'ta tsajìon-jìon ta ngatjì-la nga 'nó tsjake-no. Kò inçhiníngàsòn-kò-nájìon nga'tsi-no jè kjoanda ra Nainá títsjá-na kò kj'ítá nìchjìn nga nda inçhibisìko'tá-nájìon a'ta 'tse 'én xitse-la Cristo ra nda tsò, mì tsa ta 'ndi-ni nga ndayá tíjnaya; tí'koaá bisìko'ta-te-nájìon 'kiá nga básen-tjìà kò nga bakoon nga ngi 'én kixi-ní. ⁸Ndaá be jè Nainá kó'ki 'nó tsjake-najìon

nga'tsì-no, koni 'sín t́jín jè kjoatsjacha ra jè Jesucristo kitsjá-ná. ⁹'Kia nga bitsá'ba-la 'an Nainá, kíi kjoa k̀i ra śjé'ta-la 'an: nga katamatse-isa jè kjotsjacha ra t́jín-nájìon ko katatsjá-no kjoachjine ko nda katamachiya-no, ¹⁰mé-ni nga ta jé kjón chjáajin jìon j̀nà kjoa ra isa nda t́jín. Ko 'koaá 'sín tsje kitsahijyo ko nimé jé sakò ra a'ta tsajìon jè nichjin 'kia nga kj'íi india-ni Cristo, ¹¹nga a'ta tsajìon kata'ya-la kjoa ra kixi t́jín ra a'ta 'tse Cristo nchrabá-ni mé-ni nga jè Nainá jeya ko 'nga kájna-ni.

Jè kjobinachon jè Cristo-ní

¹²Jìon ndí 'ndsé ko ndí tichjeé ra makjín-no a'ta 'tse Cristo, mejèn-na nga nda katasijin-no, nga nga'tsì kjoa ra tíma'tiaan; ta isaá jnchro j̀nà títsjá nga'ñó-isa nga nda tímabísòn-isa jè 'én xitse ra nda tsò a'ta 'tse Cristo. ¹³Nga nga'tsì chíchàn ra síkonda ya ni'ya masen ko nga'tsì xita ra i'ka, 'koaá 'sín ijye inchibe nga kíi ndayá t́jna'ya-na ta ngatjì-la nga Cristo síxá'ta-la. ¹⁴J̀nà 'ndsé ko tichjeé, 'kia nga inchibe nga ndayá t́jna'ya; kjín ma-ni ra 'ñó inchi'bé-la ikon ra a'ta 'tse Na'ín-ná, mì tsa inchitsakjón-jìn, ta isaá inchisítáhijín ijo-la nga inchisíka'bísòn jè 'én-la Nainá.

¹⁵Kixí kjoa, t́jín i'ka xita ra 'bénajmíya-te a'ta 'tse Cristo, tanga ta kjoachini-ní nga ko'sín 'sín, nga ta jé ra mejèn-la nga isa nda síkítsahijyo ijo-la nga isa kjìn koma xita-la. Tanga t́jín-te xita ra xá nda t́jín-ni inima-la 'kia nga ko'sín inchi'bénajmíya, ¹⁶nga koó kjotsjacha-la nga chja ra a'ta 'tse Cristo. Ijyeé be-ní nga kíi xá i isíkijna-na Nainá ya aya ndayá, mé-ni nga 'an kósen-tjia jè 'én xitse ra nda tsò a'ta 'tse Cristo kó'sín nga kixi t́jín. ¹⁷Tanga j̀nà xita ra i'ka, 'kia nga ko'sín 'bénajmíya ra a'ta 'tse Cristo, ta ijo-laá ra ko inchisíko, ta jé ra mejèn-la nga j̀nà nda síkítsajna xita ko mì tsa ngi kixi t́jín-ni ikon nga ko'sín 'sín; 'koaá 'sín mejèn-la nga katatse-isa kjohi'in ra ijye tísikjiáan nga t́jna'ya ndayá. ¹⁸Tanga, ¿mé ra koma-la? Ni'sín ta kó'sín nga t'senajmíya jè 'én nda-la Cristo, a ngi koó kjohixi-la nga inchi'bénajmíya o ra mí tsa ngi ko kjohixi-la, takó 'ñó matsja-na nga ko'sín tíma.

Ko isaá ta 'ñó kotsja-isa-na nga tífi nichjin, ¹⁹nga ijyeé be-ná, tsa ko'sín tíma, tsó-ni kjoa nga maá kótijnandí-na kjohi'in ra tibatojiàan, ta ngatjì-la, nga 'koaá 'sín inchibitsa'batjí-nájìon

ko 'koaá 'sín tíbasikō-na jè Inìma Tsje-là Nainá ra a'ta 'tse Jesucristo nchrabá-ni. ²⁰'Koaá 'sín 'ñó mejèn-na, ko 'koaá 'sín tíkoñáa nga mì tsa mé kjosabà sàkò-na ra a'ta 'tse Nainá; ta isaá jnchro mì tsa tsakjon jiàan kó'sín nga kichjàa, koni 'sín nga tí'sin ki'ta, mé-ni jè Cristo jeya kíjna-ni ta mé ra koma'tiaan, a kótijnakoón-isa o ra kiyá-náa. ²¹Nga tsa kótijnakon-isa, ta a'ta 'tse Cristo-ní nga kótijnakon-na, ko tsa kiyáa, ta sikíjnesón-isa jnchro. ²²Tanga tsa ndaá tjin xá ra 'sin-isa a'ta 'tse Nainá 'kia nga tíjnakon-isa, yaá jndáa mì kì be mé ra 'siaan. ²³'Ñó chjá ma-na, mì kì be ñáa ra kjoahjíaa ta ngajò kjoa kii; mején-na tsa tsjaá ijye katiyaa mé-ni nga ya íkátijnako-na jè Cristo ya ján ngajmi, nga be-náa, isaá ta nda tjin tsa ko'sín koma. ²⁴Tanga ta ngatji-là ra kjonda tsajìon-jìon, isaá machjeén nga kótijnakon-isa i isà'nde. ²⁵'Kia nga ijye tíjngo takoàn nga 'koa 'sín isa nda tjin, be-ná nga takó kótijnakoón-isa, ko yaá kótijnako-najìon mé-ni nga kósikoo-no nga isa 'ñó kixi katamakjiín-isa-no ko katasakó-no kjoatsja a'ta 'tse kjoa makjiín-no, ²⁶mé-ni nga 'kia skajin india-ná xàngieé, batoó tsja 'se-najìon koni 'sín nga ki'sin Cristo nga tsasikō-na.

Nga 'koaá 'sín sijché ijo-ná koni 'sín tsò 'én xitse-là Nainá

²⁷Ni'sín ta mé ra katama, jè ra machjeén nga 'koaá 'sín 'tiaàn jìon koni 'sín nga bakèn-là nga 'sijn jñà xitā ra makjiín-là 'én xitse-là Cristo ra nda tsò. 'Koaá 'sín 'tiaàn jìon tsa íkatsíjen-no o ra mí íkatsíjen-no; jè ra mejèn-na nga kji'nchrè ra a'ta tsajìon-jìon nga kixíí titsajna jìon nga inchibixkàn-tjiò koni 'sín nga makjiín-ná ra a'ta 'tse 'én xitse-là Cristo ra nda tsò. ²⁸Ko, kì tà chjàn bi'nde jìon nga jñà mincháxkón-no xitā ra kondra fi-no. Jñà xitā kii, yaá ske-ni ra jñà, nga ta yaá jchija; tanga ra a'ta tsajìon-jìon, yaá nda jcha-là nga kítojokajin-no kjohi'in a'ta 'tse jé-no. Ko jñà kjoa kii ra ko'sín okoma, a'ta 'tse Nainá nchrabá-ni. ²⁹'Koaá tí'sín tjin kjoanda ra ijye ki'tsi-najìon, nga mì tsa ta jè-jìn nga ta katamakjiín-najìon ra a'ta 'tse Cristo, tí'koaá skanda skajiín-te jìon kjohi'in ra a'ta 'tse. ³⁰Nga takó 'koaá 'sín tjin kjosi ra tíhíkjoajin-najìon koni 'sín tjin kjosi ra kijcha jìon nga kísikjiáan ra 'an, ko takó tísikjín-náa kjohi'in koni 'sín nga na'yá jìon.

**Kó'sín nga 'ñó nangi iníkíjna jè Cristo nga 'sa
ítjòn kò nga jeyaá iníkíjna-ni ra ma aṣkan**

2 ¹Ndi-ni nga ijye tjin-najìon kjoajetakòn ra a'ta 'tse Cristo, kò nga ijye kò kjoatsjacha-la ma nìjetakòn-no, nga ijye nda titsajtín-koo jè Inìma Tsje-la Nainá, nga ijye tjin-no jngo kjoatsjacha ra ngi inìma-no nchrabájin-ni, kò nga ijye tjin-no kjohimatakòn, ²'koaá ma-ni, tijngokoo jìon jè kjotsja ra tjin-na nga kò'sín ngàsòn nda tijngo kjobítsjen-no, nga kò'sín-te ngàsòn jngo kjotsjacha kata'se-no nga jngó jngó-no, kò ngi ta jngo inìma kata'se-no nga titsajtìon, kò ngi ta jngoó kjobítsjen tangió. ³Kì nímé kjoa 'nià jìon ra ta jè ijo-no 'nga sikítsajna, kò nga nda kináchrjengi-no; ta isaá nangí tikítsajna jìon ijo-no kò 'koaá 'sín tikítsjen jìon koni tsa isa 'ñó xkón títsajna ra i'ka koni ra jìon-jìon. ⁴Kì tà jè níkájno ra kjonda tsajìon; ta isaá jnchro jñà tikájno mé kjonda ra chija-la ra kj'íi xita. ⁵Koaá tì'sín jè kjobítsjen kata'se-najìon koni jè kjobítsjen ra tjin-la Jesucristo. ⁶Nga nì'sín jè Cristo jè sabá Nainá, mì tsa jè kjo'ño kjomejèn-la nga kò'sín tsikijna koni tsa Nainá. ⁷Ta isaá 'koaá 'sín kitsjà-la ikon nga 'ñó nangi isíkíjna ijo-la, kò 'koaá 'sín isíkíjna ijo-la koni tsa jngo ndí xita ra chì'nda'ño tìjna, kò 'koaá 'sín 'ki kjomà koni nga'tsi ra xita isà'nde. ⁸Kia nga tsikijna i isà'nde koni tsa taxki xita, tijé 'ñó nangi isíkíjna-ni ijo-la; ndaá isìhitjasòn skanda ini'ken-ní, kò skanda krò 'ken'ta [koni tsa jngo xita ra 'ñó 'cho ki'sin]. ⁹Koaá ma-ni nga jè Nainá taxki 'ñó 'nga isíkíjna ítjòn, nga jè tìjna ítjòn-la ta yá-isa-ni; kò 'koaá 'sín Nainá kitsjá jngo-la xá ítjòn ra isa 'ñó 'nga tìjna koni ta ñáa-isa-ni xá ra 'se-la xita, ¹⁰mé-ni nga'tsi-ni ra ya títsajna ya ján ngajmì, nga'tsi ra títsajna i a'ta nangi kò nga'tsi ra títsajna ya ajin nangi katinchaxkó'nchi nga katabexkón jè Jesús. ¹¹Nga kò'sín katatsjá 'én-la nga jè Jesucristo ra tìjna ítjòn-ná, mé-ni nga jeya katijna-ni jè Nainá ra Na'in 'mí-lá.

Kó'sín tjinè-la nga katatsjen jìon

¹²'Koaá ma-ni, jìon ndí 'ndsé ra 'ñó tsjake-no, koni 'sín nga nda inchinitjasòn ki'ta jìon, kò mì tsa ta 'kia-jin 'kia nga ya tíjnako kjòn-no; isaá nda tìhitjasòn-isa jìon 'kia nga mì tsa ya tíjnako-no; tinè-la ijo-no nga nda kjòn kata'ya ki'ta-la nga jè

Nainá ijyeé tsachrjekàjin-no kjohi'in ra 'tse jé-no kò nichjin nchijón-ní tiskón-ya. ¹³ Nga jé Nainá-ní ra kò'sín síkjinchrabájin iníma-najìon 'kia nga mejèn-no mé ra 'nià, kò jè síchiya-no 'kia nga mé kjoa ra 'nià jìon, mé-ni nga katitjasòn-ni kjoa ra nda tjin ra jè mejèn-la.

¹⁴ 'Kia nga mé ra 'siaan jìon, kì tà chjàn ta inchtsajé ki'ta kò kì tà mé ra chitiya-no, ¹⁵ mé-ni nga nímé jé katasakó-ni ra a'ta tsajìon kò tì'koaá ngi tsjeé katijna iníma-no nga ngi ixti-la Nainá ra tsje títsajna katama jìon ya ajin-la xita ra ta ngakjá fikò kjobítsjen-la kò ra 'cho 'sín. Kò yaá kata'ya-la kjoatsje-najìon koni jngo nitse ra fate tsijen ya ñánda nga jñò chon. ¹⁶ Jìon jìon, jngoó 'én nda ra tsjá kjòbinachon inchibakon-la jìon. 'Koaá ma-ni, 'kia nga kj'íi jè Cristo, 'ñó tsja 'se-na nga mì tsa ta kjotjò-ni nga kò'sín tsajmesòon nga kísiká'bia jè 'én nda-la Cristo, kò mì tsa ta kjotjò-ni nga kò'sín ta 'ñó kiséáa. ¹⁷ Jè kjohi'in ra inchinikjiín jìon ra ta ngatji-la nga makjiín-no a'ta 'tse Cristo 'koaá jngoya-la koni tsa jngo kjotjò inchiningsajna jìon Nainá. Kò jè kjohi'in ra tísikjiáan tì'koaá jè jngoya-la jngo kjotjò ra ya tísjngokò kjotjò ra jìon inchi'bì-la Nainá; 'koaá ma-ni nga kò'sín 'ñó matsja-na kò skanda yaá sijngó-kò kjotsja-na kò kjotsja ra tjin-najìon. ¹⁸ 'Koaá tì'sín 'ñó tsja kata'se-najìon, kò katajngo kjotsja ra tjin-najìon kò kjotsja tsa'an.

A'ta 'tse Timoteo

¹⁹ 'Koaá 'sín koñáa tsa jè Jesús ra tjna ítjòn-ná kò'sín mejèn-la nga ndìton síkásén-najìon jè Timoteo, mé-ni nga tì'koa kata'ñó-ni takoàan 'kia nga kji'nchrè kó'sín titsajna jìon. ²⁰ Nga, mì tsa tì yá tjin-isa-ni ra kò'sín mangásòn-kò kjobítsjen-na koni jè Timoteo ra ngi kixi kiti kjoa ra síkájno a'ta tsajìon. ²¹ Nga'tsi xita ra kj'íi, sabà ta kjonda 'tseé bátsji, kò mì tsa jñà bátsji kó'sín nga síhitjasòn-la Cristo Jesús. ²² Tanga ijyeé nda 'ya jìon kó'sín nga kixi 'sín jè Timoteo, nga 'ñó nda tíbasikò'ta-na nga tí'bénajmíya jè 'én xitse ra nda tsò a'ta 'tse Cristo; 'koaá 'sín tì'sín koni 'sín basikò'ta jngo ti jè ra na'in-la ma. ²³ 'Koaá 'sín koñáa nga jé síkásén ndìton-najìon, 'kia nga ijye skee kó'sín fì kjoa-na. ²⁴ 'Ñó tjin takoàn ra a'ta 'tse Na'in-ná nga tì'koaá ndìtoón kijchòjkon sabà-te-najìon.

A'ta 'tse Epafrodito

²⁵Ti'koaá, 'koaá ma-na nga nda-la tjín nga sikásén india-najìon jè ndí 'ndsé Epafrodito, jè ra nda t́basiko'ta-na ko ti'koa nda t́báhiytako-na kjoa ra inchi**bixkàn-tjì-jin**; jè ra jìon sabà inikasén jìon, mé-ni nga jè skoòtsjén-ni nga'tsì mé ra chija'ta-na. ²⁶Batoó bátsji-là inìma-là ra a'ta tsajìon-jìon ko batoó ba tjín-là, ta ngatjì-là be-ní nga ijyee ina'yá jìon a'ta 'tse 'chin ra iska'ta-là. ²⁷Kixi kitií kjoa 'ño kjokiya, skanda kjameé 'ken; tanga jè Nainá kjòhìma**ke-ní**, ko mì tsa ta jè ra kjòhìma**cha**, ti'koaá kjòhìma**keé-te-na** Nainá ra 'an, mé-ni nga mì ti kjòba katasakó-isa-na ra 'an. ²⁸'Koaá ma-ni nga ndìton kjòn-ní nga t́sikásén-najìon, mé-ni nga tsja kata'se-najìon 'kia nga jcha india-no, ko ti'koaá ra 'an, mì tsa ti mé ra 'ño síkájno-na ra a'ta tsajìon. ²⁹Ngi koó kjòtsja-najìon nga nda t́sin-la 'kia nga kijchò koni 'sín nga bakèn-là jngo xita ra makjìin-là a'ta 'tse Cristo; ko ko'sín nda jchaxkón ki'ta jìon jñà xita ra ko'sín 'sín-te koni jè Epafrodito. ³⁰Nga ta kií ngatjì-là nga jè xá-là Cristo tí'sín 'kia nga ko'sín kjame 'ken; kitsjá-là ikon nga ni'sín katiya mé-ni nga ma s̀hitjasòn-ni jè xá ra mì kì ma t́sikò'tá-najìon.

Nga'tsi kjoa ra tjín a'ta 'tse Cristo

3 ¹Ra fi-isa jìon ndí 'ndsé ko ndí tichjeé, jè-ní nga tsja kata'se-najìon ra a'ta 'tse Na'ín-ná. Mì tsa masi-na ra 'an ni'sín ti'koa t́sín tsò-ni 'én ra kindá india-najìon koni 'sín tsò ra asa ítsikindá-no, nga kjonda tsajìon-nó koni 'sín nga t́xian-no. ²Tikindaa ijo-no a'ta 'tse xita 'cho ra ngi ta kjoa 'tse nií-ní ra 'sín ra kjo'ño mejèn-là nga bate'ta ijo-là xita nga bí'ta chiba. ³Jièn-nájién ra ngi kixi kjoa nga tjí'ta chibeé mé-ni nga 'ya-là nga xita-là Nainá 'mì-ná. Ko jièn-ná ra ngi ko nga'ño 'tse Inìma Tsje-là Nainá nga 'yaxkén ra jè; ko 'ño matsja-ná a'ta 'tse Cristo Jesús nga mì tsa jñà kji'tatakén kjoa ra 'tse ijo-ná. ⁴'An, mì tsa kjoa 'tse ijo-na kji'tatákon, ni'sín kjin skoya kjonda ra ki'se-na. Tsa tjín i'ka xita ra jè ma'ño'ta takòn kjonda ra tjín-là, tanga ra 'an isaá tse kjonda tjín-na ra ma ko'ño'ta takoàan, tanga mì tsa ko'sín tí'siaan. ⁵Kjo jin nichjin tjín-na 'kia nga isi'ta chiba ijo-na a'ta 'tse kjoa 'tse circuncisión. Xita israelita-ná ra 'an, yaá nchrabá-ni tje-na

a'ta 'tse xita ra tsi'kìn Benjamín. Ngi xita Hebreo-ná ra 'an, nga xita Hebreo jñà xita jchínga-na. Ko xita fariseo kjomà ra 'an, 'koaá 'sín nda kjòn ísihitjásòon nga'tsi kjotéxoma 'tse xita judío. ⁶Batoó 'nó nda tsaka'tá ikon jñà kjotéxoma 'tse xita jchínga-na skanda ítsangatjìngi-la jñà ra xita naxindá-la Cristo ma. Koni 'sín tjín kjotéxoma 'tse xita judío nga kó'sín nga kixi sijché ijo-ná, 'an, niyá ra ma tsaté'ta-na. ⁷Tanga nga'tsi kjoa ra ko'sín kixian-la nga 'sa íjtòn nga 'nó chjí-la; 'ndi-ni mì tsa ti mé chjí-la ra a'ta tsa'an, ta ngatjì-la nga jè Cristo tsjake 'ndi-ni. ⁸Ta nga'tsi kjoa kii, mì kì ti mé tjín-ni ra isa 'nó chjí-la koni jè kjonda ra tisakó-na 'ndi-ni nga tìbexkon Cristo Jesús ra tjina íjtòn-na. Ta ngatjì 'tse Cristo, ijyee ítsachrjéngi ijye-náa nga'tsi kjoa ra 'an kjó'nó'ta takoàan, ko 'ndi-ni ta tjé betákon-isa, mé-ni nga ngi ta jè Cristo kjín-tjìngi-la, ⁹ko mé-ni nga ma ya nda kótijnako-na ra jè. Mì tsa ta kjonda tsa'an-jìn ko mì tsa ki-ni nga nda sìhitjásòon kjotéxoma nga xita kixi kítjongiaa ya ngixkon Nainá, ta ki-ní nga a'ta 'tse Cristo makjín-na. Jè Nainá-ní ra xita kixi 'sín-na ta ngatjì-la nga makjín-na. ¹⁰Jé ra mejèn-na nga isa nda skexkon-isa jè Cristo, ko ti'koa ske jè nga'nó ra ki'se-la 'kia nga jaáya india-la; nga ko'sín tjè kjóbítsjen kata'se-na koni jè Cristo 'kia nga kisikjín kjohi'in ko skanda 'kia nga kinì'ken, ¹¹mé-ni nga ko'sín koma kjoaáya-na a'ta 'tse kjobiya.

Yaá ngajmi nakjoá-ná

¹²Tanga mì tsa tsò-ni kjoa nga ijye ijchòò ñánda nga mejèn-na nga kijchòò ko tsa mì ti mé ra chija'ta-isa-na; ta isaá jnchro 'nó tìbiné-isa-la ijo-na nga kijchòtjìngi-la mé kjoa kjòn-ni ra tjínda-la jè Cristo Jesús 'kia nga ko'sín ijchòtjìngi-na. ¹³Jìòn ndí 'ndsé ko tichjeé, mì tsa ko'sín síkítsjen jiàan, tsa ijyee 'nó nda bexkoon ra jè Jesús. Tanga jngoó kjoa 'siaan, sijcháhajin ijye-náa nga'tsi kjoa ra ijye tsato ko ta jè tìbiné-la ijo-na nga kijchòtjìngi-la kjonda ra 'sa nchrabá. ¹⁴Jè tjíya skoàa nga kijchòò, kóo nda sikíjne jè kjotjò ra a'ta 'tse Cristo sìngatsja-na Nainá koni 'sín nga xá kiichja-na ján ngajmi.

¹⁵'Koaá ma-ni, nga'tsí-ná ra ijye nda makjín kixi-ná ra a'ta 'tse Nainá, machjeén-ní nga 'koa ti'sín síkítsjeén. Ko tsa isa kj'íí 'sín bítsjen i'ka-najìon, jè Nainá siichiya nda-no kó'sín

nga s̄ikítsjen. ¹⁶Tanga jè ra 'n̄ó machjeén, nga 'koaá 'sín sijché ijo-ná koni 'sín nga ijye machiya-ná skanda 'ndi-ni.

¹⁷Jìon ndí 'ndsé kò tichjeé, kò'sín 'tiaàn jìon koni 'sín nga tísíjchá ijo-na ra 'an, kò j̄nà chj́ngi-la ra kò'sín inchisíjchá ijo-la koni 'sín t̄jín xkósòn ra j̄n inchi'bi-lajin. ¹⁸Nga 'n̄ó k̄jìn ma-ni x̄ita ra kò'sín inchisíjchá ijo-la nga kondra t̄j̄hijyo-la koni 'sín nga tí'senajmíya nga kó'sín isi'ta krò jè Cristo, koni 'sín nga ijye kjokjìn 'ka koxian-no, kò 'ndi 'ndi ngi koó ndáxkoaan nga india kotíxian-no. ¹⁹Tanga j̄nà x̄ita k̄i, ra kjehe'tà-ni kjoa, yaá kijchò ya i'nde 'tse kjohi'in. Nga ta j̄nà 'n̄ó makájno-la kjoa ra mejèn-la ijo-la kò x̄in kisíkjina Nainá. Kò j̄nà 'nga bíhijyo-ni ijo-la kjoa ra t̄jínè-la nga kosabà-la. Ta j̄nà síkítsjen kjoa ra t̄jín i isà'nde rak̄i. ²⁰Tanga ra jién, yaá ngajmi ján t̄jna ra ngi naxindá-ná. Kò 'koaá 'sín ijye inchichiñá-lá nga yaá kjinchrabà-ni jè ra kochrjekàjin-ná kjohi'in, jè Jesucristo ra t̄jna ítjòn-ná. ²¹Jè s̄ikaatj̄ya-la ijo ni'nde-ná nga ijngo ra x̄itse tsjá-ná ra kò'sín 'ki koni 'sín 'ki ijo-la ra jè nga jeya t̄jna; 'kia nga kò'sín 's̄iin, t̄jé nga'n̄ó s̄ichjeén-ni jè ra síchjeén nga batéxoma-la nga'tsi ta mé tsajmì ra t̄jín i isà'nde.

Kjoa ra machjeén nga j̄nà s̄ikítsajna ítjén a'ta 'tse kjobinachon-ná.

4 ¹'Koaá ma-ni, jìon ndí 'ndsé ra 'n̄ó tsjake-no kò ra 'n̄ó síkájno-no, jìon-jìon ra tsja 'bè-la inìma-na, jìon ma jìon kjotjò ra t̄jábé-na ra a'ta 'tse xá-na; 'koaá 'sín tíxian-no nga 'n̄ó nda t̄incha ra a'ta 'tse Na'ín-ná, jìon ra ngi koó inìma-na nga tsjake-no.

²'Koaá 'sín tíbitsá'ba-la j̄nà tichjeé Evodia kò Síntique, nga 'koaá 'sín jngo kata'sín kjobítsjen-la ra a'ta 'tse Na'ín-ná.

³'Koaá t̄i'sín tíbitsá'ba-la j̄i ndí ndsè ra taña nda inchiníxákjeé, nga t̄isikò'ti j̄nà ndí íchjín k̄i ra taña isíxáko-na nga inika'bísòn-j̄in jè 'én x̄itse ra nda tsò a'ta 'tse Cristo kò jè Clemente kò j̄nà x̄ita ra i'ka ra kisíxáko-na; nga'tsi x̄ita k̄i ijyeé ya k̄ji'ta 'í-la jè xajon 'tse kjobinachon ra t̄jna ya ján ngajmi.

⁴Tsja kata'se ki'ta-no a'ta 'tse Na'ín-ná. India-isa kò'sín tíxian-no, ¡tsja kata'se-no! ⁵Katabe nga'tsi x̄ita nga 'n̄ó nda inìma t̄jín-najìon. Ijyeé machraña-ní nga k̄j'í india-ni jè Na'ín-ná.

⁶Kì tà chjàn mé ra 'nǎo níkájno jìòn; ta isaá jè Nainá tijé-la ta mé ra mejèn-no, 'kia nga kinákjoa'ta-la, 'kia nga kítsa'ba-la kò kò'tin-la nga tse kjonda kata'se-la ra jè. ⁷Kò jè kjo'nchán ra tsjá Nainá ra isa 'nǎo nda tjín koni 'sín machiya-la xita, jè nda kosiko inima-no kò kjobítsjen-no nga ya titsajnakoo Cristo Jesús.

Kjoa ra machjeén nga jǎnà 'nǎo sikítsjen-jién

⁸Ra fehe'ta-ni jìòn ndí 'ndsé kò ndí tichjeé, 'koaá xián-no, jǎnà kjon nda tikíjna ítjòn jìòn kjoa kii: jǎnà 'én ra ngi kixi tjín, jǎnà kjoa ra 'nǎo nda 'yaxkón, kò kó'sín nga kixi sijché ijo-ná, kò kjoa ra tsje tjín, kò ra nda sasén-la xita, kò nga'tsi kjoa ra nda na'yá-la. Kò tsa tjín-isa kjoa ra 'nǎo nda tjín, ra machjeén-la nga 'nga sikíjna, jǎnà kjòn isa nda tikítsjen ítjòn jìòn.

⁹Kò'sín 'tiaàn jìòn koni 'sín tjín nga'tsi kjoa ra a'ta tsá'an kjomà-no, kò ra a'ta tsá'an itjábé-no, kjoa ra a'ta tsá'an ina'yá jìòn, kò ra a'ta tsá'an kijcha; kò'sín tihitjasòn jìòn kò jè Nainá ra ma-la tsjá-ná kjo'nchán nda kijnako ki'ta-no.

Kó'ki tse chjí-la kjonda ra kitsjà xita Filipenses ra a'ta 'tse Pablo

¹⁰Taxki 'nǎo matsja-na ra a'ta 'tse Na'ín-ná, 'kia nga be nga takó 'nǎo níkájno jìòn ra a'ta tsá'an. Mí-la tsa tsò-ni kjoa nga mì tì iníkájno-nájiòn ra a'ta tsá'an nga tì'sa ítjòn; ta jé-ní nga mì kì nditòn itjo'nde-najiòn kó'sín ma inikasén jìòn kjo'tjò-no.

¹¹Mì tsa ta ki kotíxin-na nga tjín ra tíchija'ta-na; ra 'an, ijyeeé nga-na nga tsjaá tjín ki'ta-na nì'sín ta kó'sín tjína. ¹²Ijyeeé be-náa kó'sín ma 'kia nga 'nǎo i'in-ya bitsajneé, kò be-ná kó'sín ma 'kia nga tjín ki'tá-ná mé ra nichjeén. Ijyeeé isakò-na kó'sín nga tsja 'se ki'ta-na tsa ski tjín indsi'bàa o ra kjinchrá tíbato, a 'nǎo tse tsajmì tjín-na, o ra nímé tjín-na. ¹³Maá kotojian nì'sín ta mé kjoa-ni, nga jè Cristo títsjá nga'nǎo ki'ta-na. ¹⁴Tanga takó ndaá tjín nga kò'sín inchibisiko'tá-nájiòn 'ndi-ni 'kia nga kò'sín kjohi'in tijnajiaan.

¹⁵Jìòn ra xita Filipo 'mì-no, ndaá tjíjin-najiòn, 'kia nga ijye ítjojian ya Macedonia nga ítsiki'tsiáa nga tsi'kènájmíya jè 'én xitse ra nda tsò ra a'ta 'tse Cristo, nijngo naxindá-la Cristo ra kjí'í tsasiko-na; ta jión-najiòn ra kjomà-no ki'tsí-ná mé-nioo ra kjochjeén-na. ¹⁶Skanda nga tì'kiaá-ni nga tsakátijnaa ya naxindá Tesalónica, tì india tì ijan inikasén-nájiòn kjo'tjò ra

kjochjeén-na. ¹⁷Mì tsa kì koxian-na tsa mé kjotjò ra mejèn-isa-na ra a'ta tsajìon, ta jé-ní ra mejèn-na nga katama kindá ya ngixkon Nainá kjotjò ra 'biò jìon. ¹⁸Ijyeé tse tjin-ni kjotjò ra inikasén-nájiòn kò skanda tsatoné-la koni 'ki nga machjeén-na. Skanda jnengií chiba-na 'ndi-ni, nga ijyeé 'ji jè kjotjò ra inikasén-kò jìon jè Epafrodito. Jè kjotjò ra inikasén jìon, 'koaá 'sín ngoya-la koni jngo kjotjò ra nda jne-la kò nda sasén-la Nainá. ¹⁹'Koaá ma-ni, jè Nainá ra kji'ta takòon, jè siikasén ijye-najiòn mé ra machjeén-no, koni 'sín nga 'ñó jeya tjin kjoanchiná ra tjin ra a'ta 'tse Cristo Jesús. ²⁰Jè Nainá ra Na'in 'mì-lá, 'ñó jeya katijna ki'ta skanda ta mé nichjin kò skanda ta mé nó-ni. Kò'sín katama.

'Én ra fehe'ta-ni nga síhixo'ta jè Pablo jñà xitá Filipos.

²¹Tihixo'ta ijye-ná jngó jngó xitá naxindá-la Nainá ra a'ta 'tse Cristo Jesús makjiín-la. Jñà 'ndsé ra títsajna-kò-na ti'koaá síhixo'tá-no nga'tsi-najiòn. ²²Nga'tsi jñà xitá naxindá-la Nainá ra a'ta 'tse Cristo makjiín-la síhixo'tá-no, títsajna ítjòn kjòn jñà ra ya síxá a'ta 'tse xitaxá ítjòn ra 'mì César.

²³Kò'sín katatsjá-no kjonda-la jè Jesucristo ra tjna ítjòn-ná. Kò'sín katama.